

## **Timotirhu barkof gontwat Porr dwandfakhato htafmot**

*Barkof kfo nuhas mrokfom*

Timotir damiagenrn Jisarr rihikakmor. Timotir Galesia profinsko yorhwa taun Listra thofor. Rorhu yifemr Grik thofr. Mmemtne Juda efkott. Timotir tohmohat Porr yaknimoarr misin hingneft hiyau nuhas htfasmourr. (Nd mrokfot htkfot Aposer 16.1-3). Timotir toh hanyhato ka kto taun Efesushu Kristenroh bro tohak yimar hta-momr. Nd hingrneft tohetrn Porr ndar gontwat wandfamorr.

Barkof mrokfom afo kfo kars kfo tebos mrokfom hemorr. Kfo memorr, “Yo ni, ni hatohwa Kristen met yindarim wayukatoh marnyaf hanyswann. Wom yimam nieruhamn mfrnheh bonhehruhatmm rroh mrokfo yuhamn mitohni-rahm. Nd yimam ndar bbinysofthu tamoh tamoh hti thombat kfo kangm fasoheh. Yo wom mrokfot kfo kangm wom wom mur yemrot ye juha. Yo tuhan yak duha.”

Ndm inji kfonimormn tfit sios hingrnefroh toh yukatohhato yak hta bohta yuhamn kfo pthamor. Yo sios hingrnefroh hingrnayuk yimaroh yak hta yuham kfo pthamor.

Wuroh mrokfome Timotirhu toh yuham kformor. Kfo memorr, “Ni Timotin Jisarrhu hingrna yima tohneft, tu dborioh hingrna yima tohkfot.”

**Ni Timotihu nefm yo sioshu  
tuhan yindariroh nefm duka**

## **marnyahato tamoh tamoh nefenm nakfot.**

*(Sapta 1–6)*

<sup>1</sup> Na Pora, na Krai Jisasrhu aposera. Nann ndar gontwat wandfiwann ni Timoti. Bi fasoh yimarhu tirm ruhetnom yakmo Nkifrar yo nom rhu yukatoh darwon hasiwa yima Jisas Kraiser, rofhu tngtpno na aposer hingrneft yakhato hingnewant.

<sup>2</sup> Timotiye, ni Bro Nkifrarhu mro-kfot hikwa yuhatn nanhu yon mife. Nmoh Yifem Bro Nkifrar yo nmoh Nungohtet Krai Jisars yuhuwaafhato ninhu rhu nmbuham yak marnya bomarnya-hekahtfn yima yuhur mirhurahrn.

*Kfo fura bofura mrokfom mong trohkfot*

<sup>3</sup> Na Masedoniako yibon hanyneft-pno kfohemo mrokfotn kanga nd mrokfot tfit akfohiyann. Nanhu dukeft kanga, ni mirahn Efesus ahtanyant. Nd taun Efesusu Kristenm bi yimam yitamn mkfo yuhur nneh bonhehwatmm kanga afo Efesus watohkahnn nd yimam wakfo rafotwanm. Mirahm tfit wom nndoh nndoh dukefm nd taunthu Kristenm ahanyomm.

<sup>4</sup> Mirahm nd nkifram harhu hawihnamo nkifra tndhm, yo nkifram niayuk frikef yuham tfit akfo tndh hik bohik hatohnomm. Nd nmbuhampno Kristenm tum tfit nakfo hamuh nakfo hamuhwom. Bro Nkifrar nhai hik marnyakahmr. Kraiser rroh yima yuhum htahato ee Bro Nkifrarhu dukefr hikrahm.

<sup>5</sup> Na kanga rpat nayak marnyahato rpat watohko. Mirahko nd yimaroh dukef yuhamn ahiknom. Krairhu mrokfom yakitoh kihhato yima yuhum wutham rhurahm. Inji rhurahko, tuko Kristenko nayak marnyahato rpat tohrahko.

<sup>6</sup> Wom yimam nd kfiwa mrokfom myafhonitamm tfit nd yafotha duha mro-kfomn hikwom.

<sup>7</sup> Kangm, “Nd Bro Nkifrarhu boririfhut nomn kakitoh marnyewunom. Womm nomn kfo nuhasrahnomm.” Ndt kfo furewumt. Nhai rom Nkifra boririfhut hik marnyakahmt. Kangm, be wommn akfo nuhaskahtnom romn ahikmt.

<sup>8</sup> Bro Nkifrarhu boririfhut rot dboriohet. Be tu Bro Nkifrar kfomo yuhatn nd boririfhut hikneft, rot nhai mrokfom.

<sup>9</sup> Boririfhut nhai toh marnyet yimaroh yak hta bohtayukt Bro Nkifrar htarmort. Nhai. Mrokfet yimarparoh yak duka tungunayukt htamort. Yimam boririfhut mhanyjbor-nanihato hammo bohamumiwaroh yak duka tungunayuket. Yo yimam Bro Nkifrar mong trohnihato fasoh fasoh nefm niwa yimaroh yak duka tungunayuket. Yo Bro Nkifrarhu nefm hti hhreknihato ndar bbinysofthu nefm tfit hti yuhurwaroh yak duka tungunayuket. Yo yifammam waswa yimam yo mrokfo duha yimam frdbofna fura yo krjbowur furewaroh yak duka tungunayuket.

<sup>10</sup> Yo ijoh tonita yimaroh yak duka tungunayuket. Yo Sodomthu yimam namo nefm kanjo nayet yimaroh yak duka tungunayuket. Yo yimam wom yimam yak rikohnihato tfit rroh slefm yak htewa yimaroh yak duka tungunayuket. Yo kfo fura bofurayet yimam yo yimam wom fasoh nefm

nahato tfit namhi bror htahato Bro Nkifrarhu yufat yuta fura bofuriwa yimaroh yak duka tungunayuket. Yo sios kfo yirmohwa mrokfom rhu hanitm tfit womm rom wom nndoh neft tfit ri-harhuhany ndhtet ndhtet net yimaroh yak duka tungunayuket.

<sup>11</sup> Nd sios kfo yirmohwa mrokfomn gutnius kak hikwot. Nd gutniuskfot Bro Nkifrar nanhu tirtn htamotr nann kfo ptha htfaswant. Nd gutniuskfot nd bruwohmr katiwa kanjo funa nanyjarwa Nkifrar yo yimam kfo yuta hagrhiwa Nkifrar, rorpno nd gutniuskfot niamot.

*Bro Nkifrar yuhuwaftmotrr Porr, Porr kfo yindhormorr Bro Nkifrar*

<sup>12</sup> Nmoh Nungothen Kraiss Jisasr hinger na bbukefr hemotra kfo yindhorr-wanr. Nd tur hemo hinger na bbukefr htihat dukamor nann nd rorhu hingerneftu hingerneft. Ndnatpno na kfo yindhorrwanr.

<sup>13</sup> Na tafi rorhu hingerneft yarim fnahne duha na nda ror kfo garib bogarib hnamoahat, yo tamoh tamoh nefm na namoampno rorhu yima yuhennr muh wohne thunimoahat, yo faso faso kfo rindho borindho thumoahat, ror nhai nd na nayuk neft mhtiyakrmor. Nhais. Yuhuwaftmora. Na namoaneftm ror htimohat duka memor, “Ndr niwa nefm tafi na hti duka tunguna duha ndnetrn ndhtet nefm newurm.” Rorhu htiyefft inji htihat hifa yima yuhur niamotrr nhais yak tutfarmora.

<sup>14</sup> Nmoh Nungothen Kraiss Jisasr tu mfro yuhuwaft mifhato nanhu yima yuhur kasinya-

morr rorhu mrokfom hikhato wom yimampno nayak marnyahato rpat tohneft.

<sup>15</sup> Krai Jisarr ndar bbinysoft fawihnamor nom fasoh fasoh nefm nayet yimanmoh yakneftn. Nd mrokfot tu kfo mif mif kfoyet. Yimam nd mrokfot wany yakiokfot. Na ndar yimayann fasoh fasoh nefm mfro nahato yiro fknemoya.

<sup>16</sup> To na ndhtet fasoh nefm mfro hatohet yimaya, tamohmpno wayuhuwafmora? Memor, “Ror inji hti yuhuwafhato ayakkahta, yima bugam htirahmt na hifa yima yuhurpno fasoh nefm nayet yimam yuhuwafhato yekwa yuhat.” Rom inji htiruhamn rorhu mrokfom wany yakioruhamn toh nkifranirahm.

<sup>17</sup> Ror toh nkifraniruha kinger. Nhai nohkahr. Yimanom nhai htikahnomr. Rorrpar Bro Nkifra mifer. Ndnnetn yiha yiha rorhu yufarpat bro yufat htakfot. Rorn nyingako htakfot. To be inji.

### *Fasoh nefm Timotir yukatoh duha*

<sup>18</sup> Nanhu yon Timotiye, wom kfo duka mrokfom kahukwann. Bi bingot ninhu nmbuhat bi profetm pthamomt. Na kfiwann nd profetm pthamo mrokfom ndm wayakitohtwanm yahrt tohyuk kfra inyarut kanjo. Giaman tisam niehato finji kfiwumn nd ni yakitohyuk kfra inyarum yakhato tawo tukfot. Nd kfra inyarut yakitohhato giaman tisampno yahrt watohtwant.

<sup>19</sup> Mirahn Jisarr afrtrohanr. Jisarr yakitoh kihato tu dborioh yima dukefrpno nd yahrt watohtwant. Yima yuhur mwofnnitwor tamoh nefroh naneft o fitoko yinyeft, ee btn sinyakfot. Yima yuhur kurhiwur, siny duha. Tamoh tamoh nefm

be sinya fura bofuraknihato na fura bofurakni-  
rahnm to be tunn yoh raforahnt tunhu yiyuk yi-  
hotat.

<sup>20</sup> Himeneus Aleksanderof to inji namotf Sa-  
tanrpno rifak htamoyanf. Yimam inji yak gnng-  
tatetmn nhai tfit Bro Nkifrar kfo garib bogari-  
bruhatmr.

## 2

### *Rhu rifinyhato kfo bruttnaneft*

<sup>1</sup> Rifinyhato kfo bruttnaneft, barkoft afo tuhan  
yindarim dukahato rroh rhu nmbuham kfo brut-  
tnakfot. Tuhan yindarim tamoh dukefetem o ta-  
moh krhopetem ndm afo kfo bruttnakfot. Kto tfit  
tamoh tamohm kfo bruttna yindhorkfot.

<sup>2</sup> Ndm inji kfo bruttnanihato tfit gafmanm,  
kingm kfo bruttnakfot. Bro Nkifrarppno kfo brut-  
tnayetmn nom rhu mmohato Bro Nkifrar hti yind-  
horwa nefrpam yakitohhato hikrahnom.

<sup>3</sup> Fitohtet fitohtet yimam yuta bugahato kfo  
bruttnefm, nom fasoh tkit bebt yakmo Bro Nkifrar  
hifa wany yindhor-wor.

<sup>4</sup> Bro Nkifrar hifa yindhorwor yimaroh yufam  
kfo bruttnahato nd yimam Krairsru mrokmom  
wanyhato yakneft.

<sup>5</sup> Rpa Nkifrarpar korhr. Rpa yimarpar buha to-  
hhato yima mifm yekwarm Bro Nkifrarppno brbo  
kak htewurm. Nd yimar Krai Jisaser.

<sup>6</sup> Krai tu Bro Nkifrarhu dukef yuhatn hikhato  
nmoh fasoh fasoh nefm rorn suh nanyormom.  
Rorn suh nanyor-motrm be nd Bro Nkifrarppno  
yiyuk yihotat yihotett rhumot. Bro Nkifrar nom  
tfit yak yibon bugetrn yihotat inji hingrnamort.

<sup>7</sup> Na to nd ror suh nanyormo yuhathu mrokfothu kfo ptha nuhas htfasneftn nd aposer hingerneft fak htamora. Memor, rorn rirhu arhuyuk yima tangim kfohi hanyrahm. Yima tangim wanyhato Jisasr hikruhamn tu yafothet mrokfot yakitohrahm. Na kfiwa mrokfom tu mrokfom kfiwanko.

<sup>8</sup> Lotu yiham kmi kmim kfo bruttna-neft, na kanga, yindarim Bro Nkifrar-pno brbo frtkafhato tirm yura hta hanyhato kfo bruttnakfot. Nd yimam nhai wommpno nakfo hutt nakfo nna inji nakfot.

*Dborioh nefroh naneftn tot tu metroh wondht*

<sup>9</sup> Metroh wondh yuhat kfo ptharuha. Metm wondhneft mirahm be mfro tamoh tamohht yakhato awondhnom. Tmarim mirahm be mfro mrfau yukehato tmahrut tamohht yakhato hembonginahato tmarim awondh najugnomm. Yo mirahm gort o tamohht yakhato yimanysofm awondh htanomm. Mirahm be mfro maru kfet hmbresham wiknahato awondh hta bohtanom. Nhai.

<sup>10</sup> Metm kangm Bro Nkifrar ahiknom, dborioh nefm yakitohkfot. Metm nayuk dborioh nefmn tom tu metroh dborioh wondht.

<sup>11</sup> Metm hifa yima yuhurpno nhowi rhuhato Bro Nkifrarhu mrokfom kfo ptha nuhasyuk yimarhu yinhitn rhuhato mrokfom yakkfot.

<sup>12</sup> Nhai metmn yindarim yak hhrifnihato tfit romn tohhato yindarim Bro Nkifrarhu mrokfom kfo hta bohta-kfot. Ndt na nhai wofnkaha. Rom be nhowi rhuhato be wany yakitohkforpat.

<sup>13</sup> Wawanyko, Adamr hingeranihatoh Ift hingrnamor.

<sup>14</sup> Nkifra tndht inji kfiwut, nhai Adamrpn tndhr mfnahhato mnhehrmor. Nhai. Mettpno mfnahmotr rotn nd Bro Nkifrar kfoyuk kfo rafo mrokfot riyak htafnihato fasoh neft namot.

<sup>15</sup> Metm rom be tumn yon hiyau hanyhato yiha yiha Krairhu mrokfom hikmm, yo rroh toh nmbuham rorhu tirtn htahato Bro Nkifrar kanjo ftohm, yo nd yima yak marnyanefit fakitohmt, yo dborioh nefm fak hikmm, Bro Nkifrar tfit yak-miyakrahm.

### 3

#### *Sioskfot toh yukatohyukyimam tu dborioh nefm yakitohkfot*

<sup>1</sup> Na kfo mifwa, yimar kangr, sioshu toh yukatoh yimaya atoha, hifa. Ndt tu dborioh hingrnfet.

<sup>2</sup> Nd sios toh yukatohyukrhu yau nmbuham, toh nmbuham be yak teh marnyakfot. Nhai rorhu wom fasoh nmbuhat yimam wahti nkriyafokfot. Nd yimar be rpa metrpatpno tohkfot. Nd yimarhu yima yuhur yak hta bohtahato rorhu wiyauyau nmbuhat dukefmpno yaukfot. Womm yakhato hifa rika bukr yak htakfot. Rorn Bro Nkifrarhu mrokfom womm kfo nuhas bonuhasetr rhukfot.

<sup>3</sup> Nhai nd yimar bupa bebm yehato kfo mmo bammokfot. Nhai nd yimar tamoh nefenm bm-bri kah rifhur mfnahhato tir tuyaknikfot o finji nakni-kfot. Nhai wommpno nakfo befenm rhukfot. Hifa yima yuhurn tamohm nakfo ptha marnyakfot. Ror nhai be mfro maru dukefrn rhukfot.



<sup>4</sup> Nd yimarhu yon tuhanm hifa hifa yak hta bohtahato rom rhu marnyakfot. Yonm be yifemrhu yinhitn rhu digr marnya-kfot.

<sup>5</sup> Yimar nhai turhu yon tuhanm hti yukatohaf hany marnyakahrm, nd yimar nhai Bro Nkifrarhu sioskfot toh yukatohruhatrt.

<sup>6</sup> Nd hingerneft tohyuk yimar nhai nfri Kristen yimarn nd hingerneft tohkfot. Nhai. Bi Kristen tohngotet yimarn nd hingerneft yak-hato htakfot. Nfri yimar nd hingerneft yakrahr, to be turhu yufathu yura htaneftpno Bro Nkifrar tfit wahtarahr Satanr wahtamo kanjo.

<sup>7</sup> Mrokfo hatoh hna duha yimar nd hingerneft yakneft, nhai mrokfom. Ndhtet yimar yakettn to be nhai Satanrhu rugitn fkniruhatr riruh aruhyuk yimam mrokfo bebm turuhattm.

*Sioshu hingerneft yimam dborioh nefm yakitohkfot*

<sup>8</sup> Sioshu hingerneft hingerneft yimam Kristenmpno tu dborioh nefm yakitohkfot. Nhai rom hus ngetm rhukfot. Nhai rom wain bupam yehato kfo mmo bammokfot. Nhai maruham hmarsiyakt yakkfot.

<sup>9</sup> Wutha yima yuhumpno nd tafont yak nriyafmo tu yafotet mrokfot, nd yimam yakitohkfot.

<sup>10</sup> Kangko sioshu hingerneft yimam ayanom, afo yakhato htikfot rroh hingerneft. Tu hifa hingerneft marnyewume ee btn nd hingerneft yak htakfot.

<sup>11</sup> Roh metm nhaf tu dborioh nefm yakitohkfot. Mirahm tihtrwonom akecutnom. Rorhu yima

yuhur yak hta bohtatahato rorhu wiyauyau nmbuhat dukefmpno yaukfot. Rroh rhu nmbuham be rhu marnya bomar-nyakfot.

<sup>12</sup> Sioshu hingrnanhoyuk yimar rpa metrpatpno rhukfot. Rorhu yon tuhanm yak hta bohta marnyakfot.

<sup>13</sup> Yimam sios hingrneft tohhato hifa hingrna marnyem, nd yimam tu dborioh yufat yakrahm. Nhai yakrmi hanyruhatm rom Jisasr hikwa yuhat wommpno kfo pthaneft.

*Bro Nkifrarhu kafrohet mrokfot tafont htamort*

<sup>14</sup> Ninpno nianeft bi yibon hanita, ndar gontwat be wandfiwant.

<sup>15</sup> Kanga na nia duha yinyeft o awi knga hatohneft, ndar gontwatn bi mrokfom yakrahnm nom Bro Nkifrar hiket yimanmoh toh yuham. Nom Bro Nkifrar hikwa tuhan yindarinom, nom toh nkifraniruha Bro Nkifrarhu yon kunyenom. Nomn dany rahur kanjo nd Bro Nkifrarhu yafothet mrokfot hatohwonomt.

<sup>16</sup> Rpa yima yuhuri rpa tngr nom rpat tohhato kfo pthakfot Bro Nkifrar nom yak nuhasmo tu yafothet mrokfothu mnat. Nd mro-kfothu mnat inji kroht:

Tu yima mif that yaknehato,  
 mifak dborhamotr,  
 tuhant yindars htimomr.

Ror tu mndohmb yima mifr tohmor.

Nhai wom tamoh nefen rhurmorr.

Ndm Bro Nkifrarhu Yafothatn yak nuhasyukem.

Mounmotm hti bugamomr.

Rorhu mrokfom yimam yaknimomm,

kmi kmi kfo ptha habrimomm.

Ndar bbinysofthu yimam wany yakiomomr.  
 Bro Nkifrar yura hamuhmorrn,  
 bro yufat hemorr.

## 4

### *Giaman tisaroh mrokfom*

<sup>1</sup> Bro Nkifrarhu Yafothat mrokfom kfo hik twanho mifwotm. Bi wuroh yihar brboh hniwatr, yimam Bro Nkifrar kfoyuk mrokfo yuham myak htanitmm. Myak htanihatoto tfit nd yafotham yimam tuhagrhatoto kfo ptha nnehwa yafotharoh mrokfomn o kmi yarhm kfoyuk mrokfo yuhamn hikwom.

<sup>2</sup> Ndhtet mrokfom giaman tisamn hnewumm. Ndhtet yimaroh yima dukefr, tamoh nefm yak nhtiwar, bi nohmorio. Rom nayuk fasoh nefm nhai wom duka mekahm art fasoh nefet.

<sup>3</sup> Ndhtet yimam kfo ptha kangm tuhan yakneft ndt fasohet, yo mur yeshrt ye fura bofuraneft ndt fasohet. To nd yemrote be tum dborha furamom? Na kanga nmoh yeyukmn Bro Nkifrar hingrna htamorm. Yimam bi Bro Nkifrar hikhatoto rorhu tu yafothet mrokfot yakitohetm kfo bruttnahato yanyeft nhai mrokfom.

<sup>4</sup> Tamoh tamoh, Bro Nkifrar ndar bbinysoft htamot, dborioh dborioh shrkarpar htamor, nom nhai kfo kurkfot. Bro Nkifrar kfo bruttna yindhornihatoto yak yakfot.

<sup>5</sup> Bro Nkifrar bi kfo memor, “Nd nd yeshrim wayetwako.” To nhai nom kfo kurkfot. Nom nd yeshrim kfo bruttnanihatoto yenyeft, nhai mrokfom.

*Timotir Krairhu dborioh hingrna yimar tohk-  
fot*

<sup>6</sup> Ndar mrokfom yaknihato wom Kristenm kfo nuhas bonuhasrahn, to be Krairhu dborioh hingrna yima tohahn. Yo nd ni hikwa gutnius mrokfoti sios yahuka kfo yirmoh mrokfomn tpim habokknarahmn.

<sup>7</sup> Mirahn nd bro yimam harhuwa nkifra tndh furam ayaka. Bro Nkifrar tohwa toheft watoh hik hanywontwa.

<sup>8</sup> Yimam wumtt yinyeft nhai be bmbri wumtt yi yaknikahm. Afo tum wumt-hato baruhat hatone nhombrahato tum nahti nhombra nahti nhombra tamoh tamoh wumtefm bi tu hifa hifa fekmm, ee btn wumtt kitm. Kangn Bro Nkifrarhu toheft atoha, to nd wumteft kanjo afo tu toh nhombrafot. Afo tu toh nhombra bonhombra hanyhato bi tu hifa hifa tu Bro Nkifrarhu toheft kanjo tohwo, ee ni bi nhai mrokfom. Nd hifa hifa rhu yuham bi hikwonm. Kto hifa hifa rhu nkifra-nirahn.

<sup>9</sup> Ndar mrokfot tu kfo mif kfoyet. Yimam wany yakiohato hikkfot.

<sup>10</sup> Yimam bi fasoh tkitm tohetm, toh nkifraniyet Nkifrar kekworm. Nhai frohm yakkahr. To nd rorhu mrokfom wany yakiowamn kekwor. Ndnetnom nom rorhu mrokfomn wany yakio-wanomn nmoh dukefm rorn kitwom, kangnom rorn yak marnyarahnm. Yiha yiam to be kangnom, Bro Nkifrar tohwa toheft atoh hiknom.

<sup>11</sup> Ndar mrokfot wakfo nuhas-nikahnm yo tfit wakfo hik nuhas bonuhastwanm ndar mrokfothu hik yuham.

<sup>12</sup> Ni damiag yimaye. To mirahm ni damiag

yimann wahtinomn yonenm kanjo. Ni tu yimam kanjo tohhato wom Kristenm ni htihak hanyruhamn hikrahm. Ni pthayuk mrokfom, ninhu yau nmbuham, yo ninhu yima yak marnyaneft, yo Bro Nkifrarhu yakitoh kihneft, yo ninhu toheft, watoh hikkahnn wom Kristenm inji htiruhamn hikrahm ninhu toheftn.

<sup>13</sup> Na nhai bmbri niakahane, afo ninn bro yima rifinyr ritimyuk mrokfom ritimtwanm. Ritimhato wakfo nuhas bonuhastwanm. Yo kfo hta bohta mrokfom wahitwanm.

<sup>14</sup> Mirahn ariwohsisaka Bro Nkifrarhu mrokforoh pthaneft. Eldam tir hta hanyhato kfo ptha hanymoa mrokfo yafothar to bi ninn muhmo.

<sup>15</sup> Ninhu dukefr nd na kfo hta bohtayuk mrokfomn dukefr htahato hingrnakfot. Hingrnefr hingrna marnyaruhatnr wom Kristenm htiruhamn kfo mirahm, awi hifa hingrna marnyewur.

<sup>16</sup> Ni tunhu toh nmbuhat htiafo hany yo wom Kristenm yak hta bohtiwa yuham htiafo hany inji nakfot. Inji na hanyrahn, nini ninhu mrokfom wanyuk yimam Bro Nkifrar toh raforahrko bro kotkfot tohruha yihart.

## 5

### *Wom Kristenmpno tohneftu kfo nuhas mrokfot*

<sup>1</sup> Mirahn wom yima bebparr be mfro akfo hut-tanr. Tamohm kfo ptharuhanr tunhu yifem mifrr kanjo inji kfo ptha yima boyima marnyakfot. Damiag yimam nhaf inji. Rom tunhu garbn nmemrom kanjo yak marnyakfot.

<sup>2</sup> Yo met bebparr yo met tmaht nhaf rpahtet neft nakfot. Met bebparr tunhu hiyau mmemt kanjo

yak marnyakfot. Yo met tmaht tu hifa dborioh wutha yima yuhurpno tunhu mndarem mif mift kanjo yakitoh marnyakfot.

*Yindarim noh htaniyet metroh mrokfom*

<sup>3</sup> Wom mett ramemr noh troh htanitr turpat rhu kutenwot, ni hti marsisa duha. Tamoh tamohm hti dukakfot.

<sup>4</sup> Nd met dhirt yonetet o inyenem yonetet, ninn yihato kfo mekfot, “Niko mirahko nd met dhirt ahti marsisanomt. Wahtiyaf hany-swakomt tamoh tamohm.” Nd mmemt nd yonrhu inyangur bebt harhumohat tawo rot finji rhu bebwot nd yonr hti dukakfot. Bro Nkifra inji nayet yonm hifa hti yindhorworm.

<sup>5</sup> Ramemr noh htaniyet mett nhai womm hti dukakahmt, nd metthu yima yuhur Bro Nkifrar naku kfiwut. Yiha yiha yifung marm Bro Nkifrar naku kfo hasiwatt rorn kukatohwort rothu rhu nmbuhat.

<sup>6</sup> Wom mett ramemr noh trohniyett be tuthu thatipthu tuhagrha yima yuhur korhrt, nd mett be bi sfnoh thatip furayet. Nhai wom Bro Nkifrar rhukahrt. Bi hel yita yihotatn kauwot.

<sup>7</sup> Ndnettn yindarim noh htaniyet metm nd mrokfom wahikahtnm Bro Nkifrar akfo brutnakahmn be hifa yima yuhurpar yauruhamn nhai riruh arhuyukm faso kfo bebruhatmm.

<sup>8</sup> To afo wom mrokfot wawanykomt. Wom Kristen yimar nhai turhu froh frohm o turhu yon tuhanm o turhu darbn najomrom o nmemrom o mndaremrom hti dukakahrm, nd yimar bi Bro Nkifrar mong trohwor. Bro Nkifrar hik duha

yimam niwa nefm nhai be ror niwa kanjo be inji mfro nakahm. Ror be tu faso yi mifwor.

<sup>9</sup> Yindarim noh htaniyet metroh yufam yorhwa gonborngt kangn wom met dhirroh yufam ahtakahtanm, siosn nd metm hti dukarahtm rroh rhu nmbuham, to mirahn be nd met dhir bugaroh yufam ahtayanm. Hti hanykfot fitoh mett rpa yimarpar fak dhir htanirtn nd mett 60 gunyjimetet,

<sup>10</sup> yo nd mett dborioh yufetet, tuthu yonm hifa hifa fakitoh marnya hnamotm, yo wom kmim fak marnya hnamotm, yo Kristenroh bdr wuram fuk kifsa hnamotm, yo krhopet yimam krhopam titanho hnamotm, yo wom dborioh dborioh nefm na hnamotm, tot ndhtet metthu yufatn nd gonborngt htakfot.

<sup>11-12</sup> Yo mirahn tmah dhirroh yufam bi ayakka-hanm dhir metroh yufam yorhwa gonborngtn bi ahtayanm. Nd dhirm nd gonborngt yufa htaneft afo bro mrokfot kak dbkafwom. Kfo kangm, “Nom nhai tfit wom nfri ramr yakruhat-nom. Nom be inji toh furahato sioshu hingr-nefmn yakitohnhorah-nom.” Mrokfot inji kak dbkafwont. To nom bi htiyetenom metm yuhre tmahmn yindarim noh htanineft, yima yuhum tfit sinyewatmm wom nfri ramr yekwamn nd barkof yak dbkafyuk mrokfot yi furewut. Nfri ramr yaknitamn sios hingrneft htanywomt.

<sup>13</sup> Yo rom niwa wom neft, rhu hhrek hasohato kuny kuny yi htfasneft. Yo nhai be hhrek nmbuharpaptno kuny kuny yi htfaskahm. Nhai. Kuny kuny kuny kuny rhu htfas thoft to be nd womroh mrokforoh hatone htfashato rhu ptha htfassn inji rhu htfaswom. Womm rom turoh

mrokfom rom tumn pthayukm, to nhai, nd metm be turoh mrokfom kanjo romn tfit nndo mando faso faso harhu htfaswomm wom yimam.

<sup>14</sup> Ndnnetn nanhu dukeft duka kanga fitoh metm yuhre tmahmn yindarim noh htanimm, nd metm afo tfit nfri yindarir yakkfot. Nfri yindarir yakhato afo nd yon mtitofr afo yakitoh hanyhato tu bro yon kunyet metroh hingrneft afo yakkfot. Inji naruhamn nd nom hti dbnotwa yimam nhai yarim tohnehato wom tng bebm turuhatmt.

<sup>15</sup> Wom met dhirm to bi tfit mkekutakhato Satahr tfit hikwom.

<sup>16</sup> Fitoh mett Bro Nkifrar hikwatn rothu frohemtn dhirt tohwot, rothu mmemet o najomet o nmemet o wimar-somet o yimboremet o tamohemet, to miraht nd mett be nyingarpaye ayukatoh marsisakahtanm sios kforpatn ayakitohtm. Nhai. Rotn nd tuthu yimatm yakitohkfot. Fitoh met dhirm nhai yimat duhatem, nd metrpanm sioskfot yukatohrahtm.

*Dborioh hingrnefm hingrnayet eldam yakitoh marnyakfot*

<sup>17</sup> Eldam tu bro hingrneft kakitoh-wom. Romn tohhato Bro Nkifrarhu mrokfot kfo pthiwatmt tuhant yindars wanukmt yo romn yimampno ruhato kfo hta bohta mrokfom kahukwomm. Ndhtet yimamn tu yura wuhtahato bro yufati marufat hekfot.

<sup>18</sup> Bro Nkifrarhu rfa borngt kfo kangt, “Bulmakaur wit yukham kahot krhe-wurm, mirahn tngt akitasifkahtanr ror yi yak hany juha.” Yo “Hingrnefm hingrnayuk yimam marufam



yakkfot.” Ndnettn eldam hingrnaneft rom marufam yakkfot.

<sup>19</sup> Wom yimar eldarpno wom kfo wok mrokfom kfiwurm, ni bi mirahn rorhu mrokfom awanyanr. Hus o husfirpa yimam rpahtet mrokfot nia kfo pthewum ee wanykfot.

<sup>20</sup> Wom eldar wom fasoh nefm ner, nd eldar yima nyinga riharpno kfo nyinga fnahkfot. Wom eldam inji htiruhamn yakrmirahm rom fasoh nefm nanefst.

*Timotir duka marnyahato tamoh tamoh nefm nakfot*

<sup>21</sup> Bro Nkifrarri Jisas Kraistr ee Bro Nkifrar yak htamo mounmotm, yukatoh hanitatma na kfo mifwann, na kfo nuhasyuk hingrnefm yima dukefrpno wahingrnatwanm. Tamoh tamoh nefm niwa, mirahn bro yufet yimarpami tunhu yimatrpampno dborioh nefm ayak nuhasa. Nhai. Yima bugam rpahtet nefst yak nuhaskfot.

<sup>22</sup> Bi mirahn Bro Nkifrarhu hingrneft yakitohyuk yimam tafi hti hik marnya duha bi tir hta dimandi-yakniyanm. Hti hik marnya duha tir htanihato kto nd yimarhu nefm tafont rhu-rahm, tfit ninn mrokfot thutitarahm. Ninhu yufat mrokfo duhatt rhukfot.

<sup>23</sup> Nd ninhu yatiyefr yejborhewohate mirahn be buparpam ayeya. Wain bupenmpno hta hmbrihato wayekahnn yatiyefr thu jubtwarahrn.

<sup>24</sup> Womroh fasoh fasoh nefm tafont nriyafwatm htitwonom. Htihato kfo kangnom nd yimar mrokfetr rhurahr. Womroh nefm be rhu kafroh marnye-wum, kto nriyafrahatm htirahnom.

<sup>25</sup> To be nd yuhatn wom dborioh nefm tafontn htitwonom. Wom dborioh nefm nhai tafontn htikahm kto nriyafruhatm htirahm.

## 6

### *Slefm be dborioh nefrpam nakfot*

<sup>1</sup> Kristen yimar wom yimarpno slef tohwor, nd Kristen slefr be turhu tohak yimarhu yinhitn tohhato bro yufat htakfot. Nd Kristen slefr inji na marnyaruhatr be rirhu arhuyuk yimam nhai Bro Nkifrarhu yufat faso faso kfo beb bobebruhahmt. Yo nom Kristennom hikwa yirmoht nhai faso kforuhahmt.

<sup>2</sup> Fitoh Kristen slefrhu tohak yimar Kristen yimayer, to be nd Kristen slefr mirahr fasoh tuhagrha dukefr yak-kahann akfo amiya, “Nhai mrokfom, nanhu tohak yimar Kristen yimayer. Na finji nanefthai kforuhatr.” Mirahr inji adukaya. Be yiro yima yuhurio riyindhorr mekfot, “Nanhu tohak yimar hifa Kristen yimar.” Ndhtet yindhorr yima yuhur rirhuhato turhu tohak yimarhu tamohhtet hingernefm yakitohhirahrr be hingernefm yi marnyarahm.

### *Giaman tisaroh fasoh fasoh nefm*

Nd na bi kfo hta bohte mrokfomn Kristenm wakfo nnhutwanm nd mrokforoh hikneft.

<sup>3</sup> Fitoh yimar mkfoyuk kfo yirmoh mrokfom nhai niko sios wanuka kfo yirmoh mrokfom kanjo hikkahm, yo nhai nmoh Nungothet Jisas Krairhu mrokfom kanjo hikkahm,

<sup>4</sup> nd yimarhu yima yuhur bro yufathu yakneftn yima yuhur buriwurr. Nd yimar dukef duhater. Sfnoh mfra nyisofer, nhai yima dukefr rhukahrr.

Nd tefi shrkenroh mrokfompno rinahtakhato nakfo hamuh nakfo hamuhneftn buriwutr. Ndt fasoh neft kakitohwor. Nd neftn hnewutrn womroh wuskar o tamohr htihato yima yuhu sinyaneft, nakfo yiritineft, nungurha mrokfo nahanyeft, hifa nyinga nahti duha,

<sup>5</sup> kfo baboba-neft, ndhtet nefm yakitohet yimar nhai tu wom dborioh yima yuhur rhukahrr. Yima yuhur tu faso rhu beb mifworr. Bro Nkifrarhu yafothet mrokfot nhai ndhtet yimar wom rhukaht. Inji newa yimam duka kangm, “Bro Nkifrarhu yirmoh mrokfot kfiwa yuhat toh hikruhanomn marut, wuss, yo tamoh tamohnt niayuk yihotat yak didbhatakraht burifhut kanjo.”

<sup>6</sup> Be Bro Nkifrarhu kfo yirmoh mrokfom hikhato nhai be mfro dukakahnom bok maruti wusshu harhuneft, nmoh rhu nmbuhat rhu marnyarfonomt. Nhai tamoh tamohr yak kkopenrfotnom.

<sup>7</sup> Nom nurmohat nhai wom tamohr yakitohakhato niarmonom. Tfit nom ndar bbinysoft htanyhato yi shoft nhai tfit wom tamohr yakitohakniruhatnom.

<sup>8</sup> Dfik yeshriyenm korhmnom o dfik hmbresham harhuwonom, to be ndrampmpno rhukfot. Hti tmany juha.

<sup>9</sup> Yimam mfro maruti wusshu yak dukefr mfro rhuneft, bok dukefm kekwoomm. Bok wuskaroh yak dukefr yekwatrm be tumn fasoh tkitt htewum.

<sup>10</sup> Mfro maru dukefr yakitohneft, tot ndharn boknambok dukefm mfnah-rahm. Tot tu fasoh nefm sinyewa mnakort. Yimam nd maru dukefr yekwatrm fnahnitamn boknambok krhopam

kekwo. Krhopam yekwamn yima yuhum nhai hwe marnyakahmm.

*Porr wom mrokfom hemorr Timotir*

<sup>11</sup> To ni, ni bi Bro Nkifrar pno rim tohniyet yimaye. Tamoh fasoh fasoh nefm ni brbo yi juha. Dborioh toh nmbuhathu toh yuhatn watoh nhombra won hanyswa, yo Bro Nkifrar yakitoh kih hanyhato ror tohwa toheft toh hikkfot, yo wommpno nayak marnya-hato rpat tohnefthu yima yuhur yaki-tohkfot, yo noh hmbre yima yuhurhu rhu dukefrn tohkfot.

<sup>12</sup> Bro Nkifrar hikneft resis kanjo watohwonkahnn nd toh nkifraniyuk tkitt wayakwon-twant. Nd tkitthu yakneftn Bro Nkifrar nakumorn. Bro Nkifrar nakumotr n bok yima rifiny buhar tohhato Jisasr yakmo yuhat kfo srh nuhasmonm.

<sup>13</sup> Ndar bbinysofti mount yorhwa shrkar htamo Nkifrari Pontius Pailatr-pno kfo srh nuhasmo yima Jisas Kraistr, na rof yukatoh hanitwotfa na kfo mif mifwann,

<sup>14</sup> mrokfom kfo-yukm yakitoh marnyahato hikkfot. Nd kfoyuk mrokfom yakitoh hasetn Nungo thet Jisas Kraistr yawihnerahr.

<sup>15</sup> Rorhu mounthu yarim yak dborha-hato yawihna yihar, tu Bro Nkifrar bi duka htewa yiharn kforuhatr yawih-nerahr. To nd Bro Nkifrarhu tngtpno tamoh tamohr korhwor yo rorhu tngtpno tamoh tamohr rhu hik hanitwor. Rorrpar kingroh tu Kinger, yo rorrpar nungo thet roh tu Nungo theter.

<sup>16</sup> Nd rorrpar nhai nohkfot. Yiro bro funa nany-jareftn frhabrimottr yiro riyorhwor. Nhai yimam

brbo yikfot. Nhai wom yimar htiwonrmorr, yo nhai wom yimar htikfot. Ndnettn yiha yiha nom be rorrpar bro yufat hekfot. Rorhu bbuka nanyjareft be inji rhu nkifraniraht. To be inji.

*Maru kunyet Kristenroh wom kfo duka mrokfom*

<sup>17</sup> Ndar bbinysofthu maruti wuss mfro haruhet Kristenm wakfo ptha-twanm, mirahm turoh maruti wuss htihato akfo yindhor hagrhanom. Mirahm nd mibatinita shrkarn rroh dukefm ahtanomm. Bro Nkifrar rroh dukefm htakfot. Nd Nkifrar kahuk-wornom tu bro yindhorefthu rhuyuk wonk wonk shrkar.

<sup>18</sup> Wakfotwanm, mirahm turoh maruti wuss htihato akfo amanyom, asot be tu dborioh rhu nmbuhat rhuyukt. Nhai. Mirahm inji adukanom. Tu rhu nmbuhathu yakneft, dborioh nefm yakitohhato womm tamohm kkopenwom, htihato yak hekfot.

<sup>19</sup> Inji narahm, turoh rhuyuk tkitthu tu dborioh wuskarn bi thu yibmon hanitm. Kto tu rhu nkifraniyuk rhu nmbuhat yakrahm.

*Porrhu wuroh mrokfom Timotirpno nd yimom*

<sup>20</sup> Timoti, nd hingrneft Bro Nkifrar ninhu tirt htamot, yonm kanjo waya-kitoh marnyatwant. Tamoh tamoh mrokfom nhai tu Bro Nkifrarhu dukef yuhatn yimam kfo pthakahmm, ni mirahn nd yimampno brbo aiya. Roh mrokfom be yuwi Bro Nkifrarhu gutniuskfotn kangm, ayoh mrk wuna bowunanom. Rom duka kangm, ka rroh mrokfom tu yafothet mrokfom kfo pthewum, to

nhai. Nndo yafotha duha mrokfom kfo ptha furewum.

<sup>21</sup> Wom yimam to ndhtet yafotha duha mrokfom yakitohmomn Bro Nkifrarhu mrokfot mfahonimomt.

To be injirpa nanhu mrokfom. Bro Nkifrar atoh natwihtwarko.

**Bro Nkifrarhu Mrokfot**  
**The New Testament in the Alamblak language of**  
**Papua New Guinea**  
**Nupela Testamen long tokples Alamblak long Niugini**  
copyright © 2003, 2004 Wycliffe Bible Translators, Inc.

Language: Alamblak

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2011-07-22

---

PDF generated using Haiola and XeLaTeX on 18 Apr 2025 from source files dated 31 Aug 2023

e543742f-8ea0-5b0f-8d98-b42933b0c997